



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Munisípiu Covalima**  
**25 Setembru 2017**

**Komunidade Suku Fatumea Munisípiu Covalima haksolok ho treinamentu kona-ba Demokrásia no Asesu ba Justisa husi JSMP**

Komunidade Suku Fatumea, sente haksolok ho atividade treinamentu ne'ebé primeira-ves sira hetan kona-ba Demokrásia no Asesu ba Justisa. Sentimentu haksolok ne'e sira hato'o liuhosi atividade treinamentu kona-ba "Demokrásia no Kna'ar Órgaun Soberanu sira nian no partisipasaun públiku iha prosesu halo lei nomós asesu ba justisa formál" iha Suku Fatumea, Postu Administrativu Fatumea, Munisípiu Covalima, ne'ebé organiza husi JSMP iha 21 Setembru 2017.

Partisipante sira ne'ebé hola parte iha treinamentu ne'e mai husi aldeia 4 hanesan Aldeia Fatumea, Lebo, Raioan no Mota Ulun. Partisipantes sira hamutuk eman na'in 30; feto na'in 20 no mane na'in 10 ne'ebé kompostu hosi xefe aldeia, delegadu, delegada, joventude feto no mane inklui comunidade.

Partisipantes sira deklara katak depois Timor-Leste hetan nia independensia, iha Suku Fatumea seidak iha organizaun ida ne'ebé lori informasaun ruma liu-liu informasaun sira kona-ba Parlamentu nia servisu, nomós lalaok sistema justisa iha Timor-Leste. Komunidade iha Suku Fatumea durante ne'e enfrenta dezafiu signifkativu oioin atu asesu no akompaña servisu no dezentvolvimentu sira iha Parlamentu Nasionál, oinsa membru deputadu sira prodús lei ruma ka halo desizaun politiku ruma relasiona ho sira nia vida hanesan povu iha nasaun ida. Komunidade sira laiha informasaun kona-ba saida mak akontese iha Parlamentu Nasionál, maibé hakfodak lei ne'e iha ona sein halo konsultasaun ho comunidade sira iha baze.

Maibe ho atividade ne'e bele ajuda fô informasaun kona-ba prosesu demokrásia, oinsa públiku bele hola parte iha prosesu halo lei, nune'e mós comunidade bele hatene kona-ba oinsa rezolve krime publiku no krime semi publiku sira.

"Treinamentu ne'e hanesan komitmentu ida hodi kontinua fahe informasaun ba comunidade sira liu-liu comunidade sira iha área remota, ne'ebé susar atu asesu ba informasaun sira, nune'e comunidade sira bele hatene no akompaña prosesu demokrásia iha PN nomós dezentvolvimentu justisa iha Timor-Leste", dehan Diretór Ezekutivu JSMP, Luis de Oliveira Sampaio.

Durante treinamentu comunidade sira hato'o sira nia preokupasaun kona-ba demokrásia iha Timor-Leste. Komunidade sira haktuir katak demokrásia hanesan meus ida atu ezijé partisipasaun ema hotu nian iha prosesu dezentvolvimentu. Maibé dala-barak demokrásia no liberdade ne'e uja la-tuir nia dalan loloos tanba la-ia limete hodi prejudika mós ema seluk nia direitu atu goja.

Iha treinamentu ne'e komidade sira mos kestiona kona-ba lei barak ne'ebé prodús maibe lahalo konsultasaun nomós sosializasaun ba komidade iha baze. Aliende ne'e sira mos kestiona kona-ba intervensaun husi orgaun estadu sira seluk ba servisu Tribunál nian. Liuliu preokupasaun relasiona libertasaun Komandante Milisia Laksaur Maternus Bere iha tinan 2009 liu ba kotuk wainhira Estadu deside atu hasai Maternus Bere hosi prizaun preventiva sein rona no konsidera vítima sira hosi masakre iha Igreja Suai no fatin sira seluk.

JSMP konsidera preokupasaun sira husi komidade sira nian ne'e importante no réal teb-tebes atu Governu no Parlamentu Nasionál konsidera. Tanba JSMP hanoin katak povu mak tenke sai nu'udar sentru ba desenvolvimentu nasionál tanba ne'e prosesu tomak tenke refleto povu ninia realidade atuál no esperensia sira nu'udar povu no nasaun independente ida.

Iha abertura no enseramentu ba treinamentu ne'e, Xefi Suku Fatumea, Sr. Julio da Costa Nunes husu ba partisipante sira atu fo prioridade no atensaun ba atividade ne'e nune'e bele hetan informasaun ne'ebé útil ba ita hotu tantu hanesan komidade nune'e mos autóridade lokal. Tanba atividade ne'e importante atu bele hatene informasaun kona-ba povu ninia direitu no dever sira bainhira envolve iha krime ruma, nune'e mos atividade ne'e ajuda ita bele hatene orgaun estadu idak-idak nia servisu. Xefe suku ne'e mos hatoo nia agradesimentu wain ba JSMP tanba bele hili suku Fatume, maske suku ida ne'ebé izoladu hodi fahe informasaun ne'e mai komidade iha Suku Fatumea.

Treinamentu ne'e ensera ho foto hamutuk no entrega dokumentu hanesan lei suku nian, broxura kona-ba artigu sira kona-ba direitu labarik ba Xefe Suku Fatumea.

Programa ne'e hetan apoiu finanseiru hosi Governu Timor Leste liuhosi Fundu Sosiedade Sivil.

Atu hetan informasaun liutan favor kontaktu direktamente:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org)